

四庫全書

集部

欽定四庫全書

集部

粵西文載卷八

詳校官庶吉士臣瑚圖禮

主事銜臣徐以坤覆勘

總校官庶吉士臣朱 齡

校對官中書臣王 瓚

謄錄監注臣藍嘉璐

欽定四庫全書

粵西文載卷八

桂林府通判汪森編

奏疏

兩廣到任謝恩疏

張岳

臣竊惟兩廣之地實古百粵之區內叢萬山外連鉅海
風氣殊異獠獠雜居地遠而法禁多疏貨多而貪墨如
織自非公廉並施寬猛得宜苟舉措之或偏則安危之

所繫須求實材以濟時用顧如臣者徒抱鉛槧之微能愧無尊俎之長策顧以更嘗頗久險阻粗知誤蒙厚恩畀此重任感激所至或能捐軀受材有限終懼覆餗惟聖明洞照於萬里之外俾孤忠勉竭於咫尺之間敢不俯察羣情仰遵邦憲興滯補弊去穢扶良公以減私賞罰期於信必慮而後動拙速勝夫巧遲茲雖老馬之舊途抑亦挈餅之所守苟能用效庶答鴻私

報柳州捷音疏

欽差提督兩廣軍務兼理巡撫兵部右侍郎兼都察院
左僉都御史臣張岳謹題為捷音事臣案查先准兵部
咨為懇乞天恩申嚴責任亟加征勦以安地方事該巡
按廣西監察御史陳宗夔題前事該本部議擬合候命
下本部移咨提督都御史張岳會同總兵官陳圭督同
副總兵程監并於三司中選委才力超卓二三人責令
專任以事完為期并合用兵糧議處停當一面具由奏
聞一面約期進兵凡軍中一應機宜俱聽相機行事本

部仍咨都察院轉行新代巡撫廣西監察御史馮彬隨將有功有罪人員分別具奏等因覆題奉聖旨准議欽此欽遵備咨到臣已經行該守巡兵備會同參將官督同守備府衛并地方人員備查為惡村分首從賊徒分別哨道合用漢達土兵各若干細開畫圖貼說并一應軍需等項條具報奪隨據分守右江道右參政鄭綱整飭右江兵備兼分巡道副使魏良輔暫代分守柳慶等處地方原任左參將孫繼武會呈奉臣等案驗前事依

奉會同鎮守廣西地方副總兵程鑒廣西布政司掌印
左布政使李香按察司署印僉事魏一恭都司掌印都
指揮周乾議得右江所屬柳慶等府近年以來盜賊充
斥人民逃散柳州一府所屬十二州縣被害尤甚中間
馬平來賓等縣里隆北五等處更為酷烈其巢穴深
山峒險阻北通古田永福南通潯里八寨東接藤峽諸
流西連湖貴二境最近而融縣洛容柳城朝發夕至稍
遠而龍哈忻城莫往此逐彼移其餘旁蹊曲徑高壘深

居蓋不啻狐兔之三窟而已而里隆一處魚窩等巢險峻尤極控引長江有同天塹迫臨絕壁如守雄關乃柳慶二府之輿區西南一方之劇盜盤據山川豺虎之心益橫因循歲月地方之禍彌深屢經建議未見施行若非大調兵馬廣集糧餉多分哨道遠布防禦申嚴號令明信賞罰其何以收萬全之功除積年之患哉今將府縣查過應勦首從賊徒名數村分并哨道防守把截去處與夫合用官軍兵款糧餉船隻等項逐一會同詳議

畫圖貼說備開條件呈報到臣臣等遵照節奉欽依事
理會差官舍分投齎執令旗令牌督調南丹州土官男
莫惟武東蘭州土官男韋起雲那地州土官男羅庭鳳
各目兵并左右兩江各衛所府州縣馬步官軍打手壯
款人等齊集將各官繳到畫圖貼說應分哨道書冊分
為中左右三大哨俱差官齎執令旗令牌督押尅定嘉
靖二十四年九月初七日寅時一齊抵巢按圖撲勦其
餘為惡村分應該勦殺儘兵力所及相機行事隨據中

左二哨監督右參政鄭綱左參議趙崇信呈稱五都諸寨賊徒勢益悍猾屯結寨上兵力不敷所圍有限呈乞再調別處土兵一二萬前來分布三哨以收全功臣等看得前賊堅結魚窩等寨恃險拒敵未易攻克隨將勦平廣東封川地方班師目兵於內摘取鎮安府土官男岑真寶精兵三千名田州土官男岑芝精兵五千名向武州土官男黃仲金精兵三千名東莞縣銃手五十名及漢達官軍打手人等行委廣東都司新任都指揮劉

海廣東布政司分守嶺西道右參政張烜總領隨同臣
於十一月十五日前到柳州駐劄督催功次陸續獲功
解報臣等又看得各處巢賊將次削平惟有魚窩馬鞍
龍船等寨勢極高險拔地數十丈弓箭火銃俱不能達
上有窩凹各賊歲有積聚以防官軍據高臨下礮石如
雨從古攻打未曾克破必須申飭各哨為久困之計設
法攻打恐日久人情懈弛又行委新任鎮守廣西副總
兵程鑒前去總理統督三哨并據原委左哨監督左參

議趙崇信呈報丁憂去訖隨改委中哨監督右參政鄭
綱兼管左哨監督臣等於嘉靖二十五年四月初八日
移鎮柳城縣親自臨督仍將各領哨官以軍法處治鎖
項勒限責令攻打據副總兵程鑒監統等官右參政鄭
綱等稟於本月初八二十等日購募敢死目兵黑夜藏
火毬用繩梯鈎搭絕壁偷上魚窩馬鞍二寨奪其閘門
投火毬燒其茅房賊衆驚亂各兵魚貫而登斬獲數多
其被火燒死及墜落懸崖不計其數并俘獲賊屬人口

奪獲器械等項解報前來今據前因臣會同鎮守兩廣
地方總兵官征蠻將軍太子太保平江伯陳圭議照廣
西柳州府馬平柳城融縣等縣五都里隆上油石龍鷺
頸等巢賊首韋金田韋金秀韋明濂覃朝解藍扶威韋
扶曠韋張容韋朝龍等各據險巢朋黨為患聲勢相通
其中五都魚窩馬鞍等巢自洪武初年以來不入版圖
尤為險惡諸蠻所視以為向背蓋自正德二年徵兵大
舉斬獲首級雖多然而魚窩等巢攻圍數月竟未盡克

遂且招撫是以兵散之後餘黨復布山谷頃年以來根
蔓延引占據慶遠水陸二路敵殺官軍攻劫縣庫殺戮
鄉村每殺一村則一村田土盡被包占積歲蠶食各縣
僅存附郭數里其餘大抵漫為盜區又恃其險阻狃於
招安謂官軍不能持久縱來征勦終歸於招故敢於據
險拒敵欲老我師狡猾兇狠人神共怒臣等仰遵兵部
題奉欽依調集官兵親臨調度攻勦以九月初進兵收
其禾稼兵有餘食決意持久以絕後患其團結上寨者

會兵圍困遜投別巢者黏蹤窮追誓以必破此賊乃肯
班師是以人無還心進皆死戰賊勢日蹙險遠巢寨並
皆摧滅已將各哨報到擒斬首從賊人賊級共四千零
八十四名顆轉發紀功官驗實通行造報其首惡韋金
田韋金秀覃朝解韋明濂藍扶威等明正典刑餘威所
震羣蠻膽落而馬平縣三都四都來賓縣北五賓州龍
哈八寨并象州武宣洛容等處以北及乎古田之境其
魁渠皆自投軍門願編立里甲輸納稅糧同於百姓原

被賊殺占額徵糧米今清出一千三百二十六石有奇
經報在官聽撫造冊給帖者已有二萬零六百六十三
名送出原日行兇盛甲槍刀弩箭等項共二千八百一
十七件馬三百五十五匹其班師之後陸續聽招者尚
未開報各被賊逼逐良民皆行令有司安插復業田土
或仍舊或招人耕種蠶禍消除地方寧息是皆仰仗我
皇上聖德同天春生秋肅並行以成歲功臣等奉揚天
威遵奉廟謨致此克捷非犬馬之力所能及也及照賞

以示勸罰以示威軍旅之中所繫尤切臣等所以能鼓舞羣心奮勇趨事者亦惟宣國家賞罰之典示以信必之令使之有所畏而知勸爾除前日地方失事各官如參將李榮等已奉有明旨革黜罰治不敢再參外其軍前監統領哨領隊等官或到任未久或臨事委用如廣西布政司右參政鄭綱按察司副使魏良輔分守右參將戚振原任左參將孫繼武原任都指揮李霽調任柳州府知府江滿謀畫素定策厲有方師久而氣不衰令

明而人競勸摧破危險之巢俘獲俱盡窮追連結之黨
窩穴幾空鎮守廣西副總兵程鑒未煖封川之席復揮
里隆之戈總率諸哨躬冒矢石功雖止於二寨聲實震
乎羣蠻此皆有勞於監統所宜次第優叙者而右參政
鄭綱經略於始審機分哨動皆當可副使魏良輔輯定
於終推誠招徠至者如歸况又兼督餉紀功其勞為最
廣東布政司右參政張烜諳熟地利兼曉兵機贊決征
撫之宜以靖門庭之寇勤勞歲月謀畫居多所宜並錄

廣西布政司右參議趙崇信甫破數寨乃以憂歸使其
終事必有可觀慶遠府知府王橋分兵扼險斬獲數多
師出其境供頓具備亦宜叙錄廣西都布按三司前署
印官左參政陳茂義副使劉采力破羣疑以定征勦後
掌印官左布政使李香按察使朱觀及署都指揮僉事
顧繼先皆乃敵時所懷與民同憂往來計議終始同心
其勞所宜叙及伏望軫念邊方用武之地勅下該部再
加查議將鄭綱魏良輔程鑒戚振孫繼武李霽江滿量

行陞賞張烜亦加優叙趙崇信王橋量行叙錄陳茂義
劉采李香朱觀顧繼先量行優獎內知府江滿近被論
劾閒住或陞與一官准其致仕庶人心激厲而將來任
事益知奮勉惟復別有定奪再照臣等受茲重委休戚
所關上之不能敷宣國家文德之治化服異類共享太
平乃不得已至動兵革又不能出奇決勝早收戡定之
功特以久困僅乃克之鋒刃之下實可哀憫正法明罰
當自臣始况臣等近以封川微勞叨蒙重恩陞賞過分

方切慚懼圖報未能不敢別有希冀以干清議此出於
區區至誠非由矯飾除將調征兩廣漢達官軍土官目
兵打手人等量行犒賞掣放休息其已聽撫夷獯行令
所司加意存恤未招者備行守巡官遵照臣等原行條
約逐一撫處停當安插復業及摘發泗城東蘭南丹那
地等州目兵五十名行令叅將戚振管領在於柳州融
縣來賓千蔓古零等處立營防守俟數月之後事體即
定人心稍安即行掣放臣等於本年五月二十四日班

師回還梧州總府控制地方其餘有功獲功并陣亡傷故被傷官軍目兵人等照例聽巡按廣西監察御史通查明白覈實造冊另行奏繳

陞賞謝恩疏

嘉靖二十五年十一月二十四日准兵部咨為捷音事該本部覆題節該欽奉聖旨這惡蠻寇征勦既平撫鎮等官有功可嘉張岳陞俸一級賞銀五十兩紵絲四表裏欽此欽遵又該禮部差鴻臚寺序班吳一鸞於嘉靖

二十六年六月十八日齋捧欽賞銀兩表裏到臣除欽
遵祇領望闕叩頭謝恩外緣臣往年督學廣西巡歷柳
慶知五都里隆之寇為二郡腹心之疾憤發於中志欲
靖掃逮茲再來又逾一紀道途阻塞慶遠幾為外區財
賦陷沒馬平僅存空籍勢已窮極理無姑息臣仰遵廟
謨叅稽輿論謂非偏師之力可冀旦夕之功移檄徵漢
土之兵合圍歷冬春之久乘其困憊悉就誅俘十年憤
激之夙心粗若可償四郊未夷之多壘尚有餘辱期贖

愆於後效敢希賞於清朝伏惟皇上聖度天容渥恩地
載善雖小而必錄功惟疑而從予秩祿猥加溫飽羨於
私門金幣載錫光華動乎部伍顧此微軀將何報稱若
絲之有經緯願効幅尺於良工於金惟曰從韋敢辭精
純於百鍊秉此心以對越庶少竭其涓埃臣無任感恩
激切之至

報連山賀縣捷音

題為捷音事照得先因廣西賀縣弓山礮石黃峒等巢

積年賊首倪中亮李三弟等廣東連山縣黃南梅水大
曲等巢積年賊首李金石柱等各結黨嘯聚相煽為亂
流劫鄉村殺擄人財奪占田土民不寧居貽患三十餘
年節據連賀二縣被害排年軍民黃昂黎得春等連詞
具告請兵征勦已該臣會同鎮守兩廣地方總兵官征
蠻將軍太保兼太子太保平江伯陳圭議得前賊積惡
已盈流毒甚慘屢撫屢叛勢在必征將調到廣西鎮安
思明田州南丹東蘭那地向武都康泗城歸順上林等

府州司縣土官目兵并兩廣漢達官軍民壯打手人等
分為二大哨一哨賀縣委鎮守廣西地方副總兵官沈
希儀統督廣西按察司僉事俞則全監督指揮李琮孫
文繡陳棟鄒繼芳卞爵莫如爵等共兵五萬九千五百
七十七員名進勦弓山礮石黃峒等巢首從賊徒一哨
連山縣委廣東布政司左參議朱憲章監督廣東都司
署都指揮僉事梁希孔統督指揮莫如爵黑孟陽李涇
王煦共兵二萬零七百九十員名進勦黃南梅水大曲

等巢首從賊徒及行湖廣巡撫衙門督行柳桂衡永上
湖南等道兵備分守分巡守備等官各調集官兵鄉夫
委謀勇指揮千百戶等官管領把截剋定嘉靖二十七
年正月十四日寅時一齊抵巢按圖撲剿應與湖廣官
兵夾攻者約會夾攻仍委廣西布政司左叅議朱道瀾
總理賀縣哨廣東布政司監督左參議朱憲章兼管總
理連山縣哨各軍前糧餉會本具題外續於本月二十
一日據賀縣哨監統副總兵沈希儀僉事俞則全呈報

井據連山哨監統左參議朱憲章都指揮梁希孔呈報
及據湖廣按察司整飭柳桂衡永兵備兼分巡上湖南
道副使潘子正呈稱各前來臣等查得連山賀縣二哨
官兵通共擒斬首從賊人賊級三千零一十九名顆俘
獲賊屬二百八十六名口奪回被擄男婦四名口奪獲
牛馬二百七十九頭匹器械一千零五十八件俱經巡
按御史蕭世延楊以誠原委紀功廣西按察司副使沈
宏廣東按察司副使黃光昇閱驗審勘明白獲功官軍

目兵各照賞格給賞陣亡被傷者給與銀兩以為營葬
及湯藥之資生擒內有詞者監候另議情真無冤者遵
照兵部奏准嚴法令以靖地方事例押赴市曹處決器
械貯庫被擄人口給親完聚俘獲賊屬與牛馬俱變賣
價銀入官其湖廣官兵所獲首從賊人賊級賊屬等項
備行該道俱經呈彼處按撫衙門定奪委官紀驗施行
外臣會同鎮守兩廣地方總兵官征蠻將軍太保兼太
子太保平江伯陳圭議照廣西賀縣接連廣東連山縣

地方密邇湖廣江華等縣崖峒深險林箐叢密各賊盤據負固肆兇東攻則西遯西攻則東遯急之則走入險阻緩之復糾聚出沒正德年間雖曾具奏征勦賀縣特以一面進兵不曾會合三省致使殘黨旋復嘯聚如賊首倪仲亮鄧良朝梁榮李金石住等合衆數千僭稱名號焚掠村寨占據田土逼近關廂禍延三省劫掠得志黨附益多各處無賴姦民投入夥中導之遠劫至於德慶開建等州縣亦被其害若不急為勦滅誠恐後來愈

熾深為未便臣等動調官軍土兵行委副總兵三司等
官統領進剿幸致克捷即今地方之患已除神人之憤
獲伸舊民復業安枕而卧是皆仰仗皇上聖武弘敷天
威遠振故能兵不留行賊無堅寨豈臣等犬馬微力所
能強致照得副總兵沈希儀左參議朱憲章僉事俞則
全署都指揮僉事梁希孔各監統軍兵直搗巢穴方略
素定分布周密一鼓而克其中堅多方以翦其餘黨窮
深極險無所不到信賞必罰令人莫犯致茲成功之速

由其協謀之固切宜優叙內沈希儀未抵新任即泣戎
行而能慷慨登途誓清妖氛指授諸將咸中機宜積勞
致疾志猶不衰當稍為優異以勸將臣左參議朱道瀾
僉事奚良輔先後總理糧賞稽核周密錢糧清裕副使
沈宏黃光昇各閱視紀功存哨明當人情厭服皆有勞
於軍前所宜並叙者也及照廣西布政司掌印左布政
使李香右布政使鄭漳按察司掌印按察使楊本仁都
司署印署都指揮僉事周乾廣東布政司掌印左布政

使韓楷右布政使蔡雲程按察司掌印按察使林應標
都司掌印署都指揮僉事夏忠咸以弭盜安民為心始
終計議以濟厥功亦皆不可不錄者也再照湖廣按察
司副使潘子正布政司左參議洪世文推同舟之義以
分鄰境之憂各飭所部會兵截殺號令嚴用首尾相應
破馬鞍白石二巢以除兩界盤據之禍但越境遯逃無
不當時擒斬功雖三百有餘其利益不可勝數此所宜
叙論者也又查得領哨指揮卞爵莫如爵等與湖廣領

兵把截隨軍委用等官守備都指揮段欽以都指揮體
統行事指揮易堂等職任雖有大小皆能各效勤勞以
副委用相應量加獎賞以酬其勞者也伏惟皇上軫念
邊方用武之地勅下該部查議將前項有功官員議擬
上請量加陞賞庶人心激厲而將來任事益加奮勉惟
復別有定奪其餘有功獲功并陣亡傷故被傷官軍目
兵人等照例聽各該巡按御史通查明白覈實造冊另
行奉繳

留任兩廣謝恩疏

嘉靖二十六年二月初三日准吏部咨為乞留提督大臣以責成功以安邊境事備咨到臣臣竊惟蠻夷為患雖治古隆盛之世所不能無高宗有鬼方之伐周宣有蠻荆之師皆得人而專其任持久以要成功故能殲厥渠魁齊一醜類四海內外咸仰德威巍然三代之上號稱中興伏惟皇上臨御以來文教覃敷武略遠振九夷八蠻重譯獻貢無敢干紀負犯以速天誅雖高宗周宣

中興之烈未能及此而臣受任邊疆無方叔召虎顯允
旬宣之材致茲小醜尚肆陸梁雖仰賴皇威時或戡定
揆之止戈之武義甚愧之方將屏息以俟謹訶不謂大
度包容復隆委任輟其明刑之召俾久督戎之司揣分
奚堪臨事彌懼臣再惟薶除狼莠本為嘉禾然用力弗
審反傷禾根惟茲事勢之相疑要在審幾而善處顧臣
愚昧非所能辦惟有厲果毅之心竭匪躬之節上奉廟
略俯采羣策慮善而動蚤圖即叙之功從人所欲庶遂

息肩之慶臣之深衷耿耿在此

地方疏

霍韜

竊見新建伯南京兵部尚書兼都察院左都御史王守仁奉命巡撫兩廣已將田州思恩撫處停當隨復勦平八寨及斷藤峽等賊臣等皆廣東人與賊鄰壤備知各賊為患實迹竊嘗切齒感額而嘆曰兩廣良民何其不幸生鄰惡境妻子何日寧也又嘗竊計曰兩廣何日得一好官員勦平各賊俾良民各安其生而頑民染患未

深者亦得草心向化也乃今恭遇聖明特起王守仁撫
勦田州思恩地方臣等竊謀曰兩廣自是有底寧之期
也聖天子知人之深也是役也臣等為王守仁計曰前
巡撫動調三省兵若干萬梧州三府積年儲蓄軍餉費
用不知若干萬復從廣東布政司支去庫銀若干萬米
不知支去若干萬殺死疫死狼兵鄉兵民壯打手不知
若干萬僅得田州安靖五十日耳自是而思恩叛矣弔
巖賊出圍肇慶府矣殺數千家矣此賊併時同出益與

田州思恩東西相應和者也若王守仁者乘此大敗極
敝之後仰承聖明特擢之恩雖合四省兵力再支庫銀
百餘萬支米數百萬勦平田州報功級數萬人亦且曰
天下大功也然而守仁不役一卒不費斗糧只宣揚聖
下聖德遂致思恩田州兩府頑民稽首來服其奉揚聖
化以來遠人雖舜格有苗何以過此臣等是以歎服王
守仁不惟能肅將天威實能誕敷天德也若八寨之賊
斷藤峽之賊又非田州思恩可比也天下十二省俱多

平壤惟廣西獨在萬山之叢其土險其水迅其山之高有猿猴不度飛鳥不越者故諺語曰廣西民三而賊七由山高土惡氣習兇悍雖良民至者亦化為賊也八寨賊洪武年間所不能平斷藤峽成化八年都御史韓雍僅得討平及今五十餘年遺孽復熾故廣西賊巢柳州慶遠鬱林府江諸賊雖時出劫掠官兵亦屢請征之若八寨賊則自國初至今未有輕議征勦者蓋謂山水兇惡進兵無路消息少動賊已先知一夫控險萬兵莫敵

故百六十年未有敢征八寨賊者也賊亦恃險肆惡時
出攻圍城堡殺掠良民何啻萬計四方頑民犯罪脫逃
投入八寨則有司不敢追攝矣鄰近流賊避兵追勦投
入八寨則官兵不敢誰何矣是八寨者實四方寇賊淵
藪也斷藤峽又八寨之羽翼也廣西有八寨諸賊猶人
有心腹疾也八寨不平則兩廣無安枕期也今王守仁
沉機不露掩賊不備一舉而平之百數十年豺虎窟穴
掃而清之如拂塵然非仰藉聖人神武不殺之威何以

致此臣等是以歎服王守仁能體陛下之仁以懷綏田
州思思向化之民又能體陛下之義以討服八寨斷藤
峽梗化之賊也仁義之用兩得之也謹按王守仁之成
功有八善焉乘湖兵歸路之便則兵不調而自集一也
因田州思思効命之助則勞而不怨二也機出意外賊
不及邀所誅者真積年渠惡非往年濫殺報功者比三
也因歸師討逆賊無糧運之費四也不役民兵不募民
馬一舉成功民不知擾五也平八寨平斷藤峽則極惡

者先誅其細小巢穴可漸施德化使去賊從良得撫勸之宜六也八寨不平則西而柳慶東而羅旁綠水新寧恩平之賊合數千里共為窟穴雖調兵數十萬費糧數百萬未易平伏今八寨平定則諸賊可以漸次撫勸兩廣良民可漸安生業舒聖明南顧之憂七也韓雍雖平斷藤峽賊矣旋復有賊者實當爾時未及區畫其地為經久圖俾餘賊復據為巢穴故也今五十年生聚則賊復熾盛也亦宜若八寨乃百六十年所不能誅之劇賊

山川天險尤難為功今守仁既平其巢窟即徙建城邑以鎮定之則惡賊失險後日固不能為變逋賊來歸不日且化為良民矣誅惡綏良得民父母之體八也或者議王守仁則曰所奉命撫勦田州思恩也乃不勦田州則亦已矣遂勦八寨可乎臣則曰昔吳楚反攻梁景帝詔周亞夫救梁亞夫不奉詔而絕吳楚糧道遂破吳楚而平七國安漢社稷夫不奉詔大罪也景帝不以罪亞夫何也傳曰閫以內寡人制之閫以外將軍制之又曰

大夫出疆有可以安國家利社稷專之可也古之道也是故周亞夫知制吳楚在絕其食道而不在於救梁也是故雖有詔命有不受也惟明君則以為功若腐儒則以為罪今王守仁知田州思恩可以德懷也遂約其降而安定之知八寨諸賊百六十年未易服也遂因時仗義而討平之仁義之用達天德者也雖無詔命先發後聞可也況有便宜從事之旨乎或者又曰建置城邑大事也區處錢糧戶部職也不先奏聞而輒興功可乎臣

則曰古者帝王千里之內自治千里之外付之方伯而
已是豈堯舜湯武聖智反後世不如哉蓋慮與圖既廣
則智力不及與其役一已耳目之力而無益於事孰若
以天下賢才理天下事為逸而有功也是故帝王之職
在於知人而已既知人之賢而委任之矣則事之舉
錯一以付之而責其成功若功效不孚乃制其罪可也
今既任之又從而牽制之則豪傑何所措手足乎是故
王守仁之平八寨也所殺者賊之渠魁耳若遁逃者固

未及殺也乘此時機建置城邑遂招逋逃之賊復業焉
則積年之賊皆可化為良民也失此機會撤兵而歸俟
奏得旨乃興版築則賊漸來歸又漸生聚據險結寨以
抗我師雖欲築城亦不能矣昔者范仲淹之守西邊也
欲築大順城慮敵人爭之乃先具版築然後巡邊急速
興工一月成城西夏覺而爭之已不及矣爾時范仲淹
若俟奏報豈不敗乃事哉王守仁於建置城邑之役蓋
計之熟矣錢糧夫役固不仰足戶部而後有處也其以

一肩而分聖明南顧之憂可謂賢矣不以為功反以為過可乎先是正德十四年宸濠謀反江西兩司俛首從賊惟王守仁同御史伍希儒謝源誓心效忠不幸奸臣張忠許泰等欲掩王守仁之功以為已有乃揚諸人曰王守仁初同賊謀及公論難掩乃又曰宸濠金帛俱王守仁伍希儒謝源滿載以去當時大學士楊廷和尚書喬宇亦忌王守仁之功遂不與辨白而黜伍希儒謝源俾落仕籍王守仁不辨之謗至今未雪可謂黯啞之冤

矣夫國家論功有二道焉有開國效功之臣焉有定亂
拯危之臣焉開國之臣成可侯也敗則虜也雖勿崇焉
可也惟禍變倏起社稷安危凜乎一髮效忠定亂之臣
則不忘也何也所以衛社稷也昔者王守仁之執宸濠
也可謂定亂拯危之功矣奸人猶或忌之而謗其短夫
如是則後有事變誰肯效忠乎甚矣小人忌功足以誤
國也臣等是以歎曰王守仁等江西之功不白無以勸
勵忠之臣若廣西之功不白又無以勸策勲之臣是皆

天下地方大慮也王守仁大臣也豈以功賞有無為重輕哉第恐當時有功之人及土官立功之人視此解體則在外撫臣遂無所激勸以為建功之地耳臣等廣人也目擊八寨之賊為地方大患百數十年一旦仰賴聖明任用守仁以底平定不勝慶忻今兵部功賞未見施行戶部覆題又復再勘臣恐機會一失大功遂沮城堡不得修築逋賊復據巢穴地方不勝可慮也是故冒昧建言惟聖明察焉乞早裁斷俾官僚早得激勸城寨早

得修築逋賊早得招安良民早得復業嶺海之外歌詠
太平祝頌聖德實臣等所以報陛下知遇一節也亦臣
等自為地方大慮也不得已也為此具奏

查盤廣西錢糧舉劾官員賢否疏 錢 薇

臣等遵奉勅諭內事理前往廣西查出賊犯武官王佐
等文官潘宇等已經叅提外臣等竊思人臣以人事君
其貪黷者固不當隱匿以廢法而其廉能者又胡敢不
陳列以上聞況銓司考功覈過以行黜陟於三年朝覲

之期實藉勅差諸臣體訪於外得之聞見之公察之毀譽之表摘實上陳因以下銓司列等第秉公叅核乃成規也臣等安敢默默以負聖明之簡任哉除才猷方顯成績未昭如布政司右叅政顧遂按察司僉事李義壯俟政成日撫按另行外訪得按察司按察使陸銓聽訟獄如決流去姦貪如鋤莠况負博雅之才實為遠到之器副使蕭晚老成練達民夷懷服布政司左布政使祝續清修勤慎始終壹節原任右叅議今陞副使陳大珊

端確詳慎政有條理潯州府知府李章政不求名守不失已居官未踰一載儲粟已及八千思恩府知府陳璜才智服九司之夷威信制八寨之寇若令久任必裨邊防慶遠府同知鄒志學志屬於操修才長於幹濟潯州府通判陳文恪守清苦之節更多文雅之政上思州知州陳世瞻興學校以化夷守官箴以勵已以上諸臣聲猷顯白政蹟旁敷據案卷而可稽采輿論而足信臣等用為地方幸焉若南寧府知府郭楠昔居言路直聲可

尚今臨邊郡晚節全隳任托官屬廣通納賄之門輕視
民命肆箝告訐之口梧州府通判林祿賑濟則冒濫錢
穀而不明勘事則漫捉村民而致變署邑篆縱庫役侵
銀而不盡舉委查盤匿各縣姦弊而不伸報桂林府推
官蘇璞佐郡數載而身虧三事之戒署印興安而民有
四苦之謠左州知州方紀龍暗於政體闖茸無為汙於
聲聞振揚何望柳州府通判劉光任吏胥之賣賊送卷
冊而舛數誰云知慎豈謂能廉恭城縣知縣龔昕出入

庫銀而每減短收支倉糧而聽吏書冊籍不立穢弊日深蒼梧縣知縣項寵任庫子梁賢為心腹盜官銀四百而不問若他那移展轉積弊實多宣化縣知縣周愛受主簿符綉之侮弄侵庫銀踰百而不知其懦弱昏迷尸素已甚以上諸臣才既不瞻志尤自隳故政敗於因循而怨興於積久臣等甚為邊方憫焉然臣遍歷兩江九郡之地華夷雜處干戈相尋歲無寧月月無寧日其故何哉蓋守土之臣拊馭有方則相率來服一乖化理旋

致跋扈今廣西各官除二司外若抗志臚仕而以遠大
自負如李章輩蓋其卓然者否則以災方瘴癘自隳其
心而苟營歸計恒比比焉若郭楠輩特最著者耳伏望
勅該部嚴加查訪如果臣言不謬將陸銓等或超擢或
資陞郭楠等或別用或罷黜且自今益加意邊陲之選
有善必賞有過必懲則勸戒行而人知勵矣再照桂林
府同知趙遠已蒙嘉靖十七年考其才力不及送部別
用臣等即其運用知其才稟誠如部考但本官在任三

年不隨家口始終清白亦人情所難又平樂府教授鄒魯本係儒官不預錢穀之責但一方士民莫不懷服則素履可知并望勅該部一體查訪量為錄用謹題請旨

為韓雍孫乞恩比例錄功疏代作

王世貞

臣惟聖主之所以整一字寓垂拱而成安攘者唯賞罰而已若乃議賞而至延世慎終而復追遠此固鼓舞之大權而亦使民歸厚之要道也是以孫叔之後見收於負薪甘陳之封仍廣於易世竊念臣高祖都察院右都

御史韓雍弱冠成進士為名御史用廷薦擢右僉都御史巡撫江西等處即奏革寧府護衛開百年曲突之謀進督宣大諸邊復破却迤北強敵為一時干城之重屬景泰天順之季以迨成化初年廣西荔浦修仁大藤峽等處蠻猺廣東高雷廉等處并海面流賊作亂攻剽城邑殺慘王臣一時文武大吏雖望如柳溥材如葉盛不能決策平蕩以致賊勢猖獗羽檄縱橫百姓罹塗炭之苦九重深宵旰之慮臣祖由兵部侍郎出叅浙藩尚書

王竑會推左僉都御史贊理南征軍務比時雖與都督同知趙輔共事而臣祖勅諭尤重事寄獨專臣祖受賑啟行陳師鞠旅誓不與賊俱生當率漢達官軍十五萬分三道並進直搗大藤峽諸蠻巢穴擒斬賊首侯大狗李吉衡楊光志等共四萬一千餘級奪回被擄男婦二萬餘人平除寨洞八百三十六處奏捷上聞趙輔進封武靖伯臣祖陞左副都御史仍留巡撫成化三年內蠻寇復發臣祖督兵征進柳州大容山北流容縣雞冠山

博白等處擒斬賊首鄭昂等共一萬九千餘級四年五年又歷征進謝仙牛嶺山等處擒斬首從賊七千三百餘級丁憂離任該兵部會推陞右都御史總督軍務仍理巡撫於梧州地方開設軍府振揚國威六七八年征進團鄧山南寧等處擒斬首從賊共八千三百餘級十九年征進七里沙田高鄉等處擒斬首從賊共七千九百餘級節奉憲宗皇帝褒獎勅諭見在臣祖前後功次國史家傳廣志及兵部堂稿可查臣祖因拮据軍事心

力耗損跋履瘴險病癘交侵乞歸養疾未老而逝荷蒙
聖恩給予應得祭葬子某自以二品考滿蔭授光祿寺
署丞弘治十年內該總督兩廣左都御史鄧廷瓚巡按
廣西御史丘天祐合疏稱臣祖無前之偉績善後之宏
猷地方軍民家家尸祝若使國家無臣祖是無兩廣矣
禮官覆勘無異題請於梧州府立祠春秋饗祭惜一時
銓曹失伸崇贈之典本兵未及世賞之議而臣祖居官
廉潔宦橐蕭條脣祚衰微饘粥空乏既不能伏闕陳上

迴九重之顧又無彊有力者以為之援因循至今雖嶺
徼之香火尚新而桑梓之蒸嘗不繼臣代居家嫡實切
痛心切念趙輔雖為總帥其督戰進止皆出臣祖拱手
受成獲開茅土世世不絕又有縣丞陶魯者一部曲耳
雖累積戰功位至藩伯而獲級前後不滿二萬得錦衣
千戶世襲及查近年尚書殷正茂凌雲翼俱以兩廣功
次蔭世襲千戶臣祖運籌決勝之績比之輔魯孰重孰
輕披棘草路之勞以擬殷凌孰難孰易必有能辨之者

又查得右都御史顧佐奉職仁宣之朝近以撫臣題請
超贈少保臣祖勛代更優年祀尚近於贈官尤宜為此
比引前例陳情奏請懇乞天恩下吏兵二部覆查無異
將臣祖銜恤於九泉而臣亦回生於一線疆場之吏咸
拊膺而效死綏荒服之氓亦加額而思報德矣

恢復古田縣治議處善後疏

吳桂芳

議照廣西古田獐賊兩犯省城劫庫戮官造孽深重臣
等職司撫鎮控制無方敢不奮圖義舉以昭國威以塞

愆咎但前項賊徒盤據古田縣治歷有歲年勾結通省
撞徒實非一夥詢之地方故老考之大征往牒及集一
時司道將領可與籌策之臣皆甲可乙否內副使王化
係廣西人勸阻尤力謂弘正兩次大征皆坐調兵不過
十萬以致單弱取敗班師之後變出非一旦狼兵相傳
古田之敗至今寒心未足深恃今欲大舉必須痛懲往
事動調狼兵十五萬仍奏調永保土兵四萬湊浙福烏
銃等兵共二十萬并請發錢糧四十萬兩期以一年始

保必克若錢糧不足調兵數少則不惟師出無成不過
戮附近疑似村獐以報凱而師退之後報復騷然昔人
覆轍恐復蹈矣臣見羣議背馳莫能相下若臣違衆冒
然為之萬一錢糧不繼師出無成不可收拾是臣以獨
斷致敗而益重貽禍於地方也況訪古田之縣雖久為
獐人所據然今兩次倡變肆逆之徒節據訪報不過下
六里內鳳凰村首從七百餘人其餘皆越村偷牛出江
討鹽小賊而自種自食者固多至其上四里獐人則頗

不為盜稍向官府故大征則玉石不分多戮無辜有傷
天地之和鵬勦則正賊中據衆獐外環殊無進兵之路
坐是徘徊展轉未敢輕發但姑加調守狼兵增實軍伍
營堡申嚴巡緝以為修舉內治杜絕再犯之圖并計擒
行兇賊犯招徠向化獐人委官入縣開山通道以為興
縣復治化暴為良之計仰仗天威遠布其縣中上四里
獐人各已欣然向化納糧服役下六里惡獐亦各赴縣
遞結乞撫臣所遣該縣典史廖元已入居舊存縣城署

掌印信撫處民獐上下相安往來無忌守備卜禎亦入
彼中撫諭獐民老少歡欣送迎惟謹且至請兵立堡願
子受學昔時畏途虎穴今幸沛然大通向來梗化頑夷
今各憬然內向縣治成恢復之勢國威有振起之機雖
極知出其下策然竊計目前錢糧必難湊手日後利鈍
又難逆料審度時勢圖維厥終實萬萬非得已也

議復衡永行鹽地方疏

照得兩廣地方素為多盜之區師旅頻興軍餉無措該

督撫諸臣先後建議設立鹽廠委官抽鹽資彼餘鹽之利以供餉用之費行之既久上下相安百數十年於茲矣近者都御史鄢整理鹽法議改衡永二府盡食淮鹽遠涉洞庭經歷風波遷延歲月本輕脚重商既不樂於行而鹽來既艱其價必高衡永之人舊食廣鹽每斤不及一分而淮鹽之價則倍之矣以百數十年輕價之鹽而一旦令之出加倍之直於民情益不便也臣自蒞任以來節查梧州稅餉比前頓減節據該道查清回報皆

云以衡永之鹽既阻而軍餉之入遂稀已經案行議報
去後今據前因臣會同議照強兵之道足餉為先興利
之方便民為要兩廣素稱多盜兵戈不息供饋實繁其
餉用之資類取給於鹽利之稅皆權納於橋關今考梧
州一關之稅往昔頗增益以湖廣衡永二府盡食廣鹽
惟鹽之疏通故稅入之頗裕其來尚矣其衡永二府之
民安食廣鹽百有餘年亦以彼地水陸近便鹽貨阜通
之易也夫何邇年以來議將衡永地方改食淮鹽遂將

廣鹽停止察議者之意本為增兩淮鹽課之計但淮鹽之抵衡永有水道阻運之難而衡永之食淮鹽受姦商刁措之苦且淮之官鹽其來有限而廣之私販遂致盛行徒減兩廣之軍需何益兩廣之歲課於上無補於下有虧既非通商足國之規又宣導利便民之道况開私販之門啓椎埋之漸地方隱憂誠有大可虞者所據該道議復舊規辨析分明似應依擬

會議軍餉征勦古田疏

張瀚

議得古田巨賊據三鎮十里為巢穴連八寨為聲援越
省城劫藩庫戕方面砍王門誠覆載之所難容真神人
之所共憤且該縣官吏師生僑寄省中編戶齊民流移
他處垂六十年竟自執迷宜一朝夕所能招撫近該主
簿廖元深入彼中名雖護印實則為質且不惟該縣之
土地人民不復得見天日而鄰境鄉村無日不遭劫擄
之苦省城官司無夜不畏窺伺之姦蓋天將殄其種類
故先厚其兇虐此正數窮理極之時大征之舉在所不

容已也除合用大小哨官兵器械等項及糧餉一節如
總兵俞大猷揭稱先發銀兩前去湖廣衡永等處糴米
合用銀四萬兩右江府江二道各銀五千兩左江道買
馬四百匹約銀四千兩及懸賞格置軍器等項尤不下
數萬兩今司帑被劫之後止有馬價銀八百三十八兩
專備地方買馬大征其餘多係解京錢糧即宗室祿米
軍糧且不敷一季支放已經另詳呈乞議處而今欲動
大衆興大役雖盡括解京錢糧其何能措給萬分之一

也查得嘉靖三十四年浙直借去兩廣軍餉銀共二十萬兩止還過銀三萬兩尚有一十七萬兩未還三十七年該四川借去兩廣軍餉銀三十萬兩訪聞彼處見有十萬五千兩未動夫浙直四川素稱財賦之藪尚欲別省協借矧廣西地瘠民困朝不謀夕今欲勦除數十年之逋賊發紓數十年之積怨一時軍餉之需何從取給伏乞疏請轉行三省撫按查將前借銀兩差官解送本省及多方預處充足以備分投委官辦集前項諸費聽

候臨期舉事等因到臣案查古田縣去府僅百餘里田土縣治盡被獐賊占據已經五六十年的治年間襲殺副總兵馬俊參議馬鉉正德年間攻陷洛容縣嘉靖四十三年十二月越入省城劫去庫銀數萬兩參政黎民衷被害四十四年八月復越省城被官兵挫退若不亟行盡定則古田陸沉永不可復今應議處進勦機宜約計共調廣西土官目兵及僱募烏銃手等軍兵十萬員名分派七大哨用監督司道官兵員統督將領官七員

又分三十八小哨用指揮三十八員千百戶七十六員
監統進勦但其巢穴深遠盤據本省兩府四縣之地外
連湖廣貴州之間其中林箐深密蜂窩蟻穴百十餘處
衆號數萬地有三厄之險鳥道攀援水有牛河下流迅
馳如箭此皆必經之路行師進勦自昔稱難頃據總兵
官俞大猷建議謂須多集兵馬四面合圍奪險通道期
於必克誠勝算矣然興兵十萬日費千金姑以半年為
期計須二十萬兩軍器火藥戰馬賞犒諸凡雜費不與

馬廣西物力素薄自來兵餉之費皆仰給於廣東稅課之積往歲稅銀饒裕率數年始一大征故歲供常有餘而猶得以貯積濟他省之急頻年海洋多盜商舶既少征收已減縮過半又師旅煩興招兵增戍殆無虛日此時兩廣之力何能供十萬之衆備半年之需乎所據各司道會議前因誠非得已況浙江布政司除已解外見有銀一十三萬兩四川見貯亦不下二十五萬兩俱應查照原數補解前來容臣督率俞大猷預備糧食召集

兵馬博選將領分定嚮導闕會湖貴併力堵截刻期舉
事庶幾有濟若銀不滿數則兵難多調兵數既少則分
布不周伏望皇上憫念遐荒縣治久廢宿寇構患無已
勅下該部悉從臣等所議將各省原借去銀兩務先扣
足二十萬兩尅期押解至廣西布政司或梧州府交割
以濟緊急軍需之用俾臣等文武諸臣各得以畢殫犬
馬之力少效涓埃之報不勝幸甚

議復梧鎮班軍疏

准兵部咨該巡按廣東御史王同道條陳四事內開裁班軍以省行糧大略謂兵以衛民而廣東之兵不得衛此方之民督府開鎮於梧而廣州左右等十衛香山增城等七所共撥官軍二班計一萬餘員名哨捕共派廣東本折糧五萬石起解梧州廣備倉以備行糧之用廣東資於廣西甚侈及至廣西征遣又不免募狼土之兵是在廣西為虛名在廣東為實費豈非舍己之田而芸人之田要將前項官軍內摘留二千名赴督府輪班其

餘發回衛所糧米扣留三萬五千石以資廣東軍餉之用等因該部未經行查以為前兵實有萬數兵糧似可減省遂依其所擬覆題移咨前來臣查得廣東前項衛所官軍原分二班更番前赴軍門鎮夷營分撥營堡關隘守把并防守鎮城原非隨哨捕閒散之役自開府及今百餘年遵行宜有深意存焉非可以片言數語概其顛末也今將裁革中間事體於地方有無關係遽難定擬隨行蒼梧守巡道右參政曹天佑等呈稱議照督府

開鎮梧州總轄兩省原議調發廣東官軍一萬員名折糧五萬石定自國初其來已久近年廣東詳允守護城池及裁革總兵衙門已撤回官軍并年久逃亡事故共五千餘員名見在鎮夷營官軍共只四千六百餘員名分為兩班每班二千二百餘員名是下班者亦彼暫時守城之數而實在鎮夷營者止二千三百餘員名而已及查撥守龍江等四營堡蒼梧藤二縣所屬非守梧州一城也撥守桂平之屎灣堡平樂之福登昭平等七堡

俱隸平樂與潯州非獨守梧州也撥守廣東之新寧恩
平此二縣者廣東所屬非獨廣西之梧州也通計撥出
戍守官軍九百九十七員名尚存官軍八百二十餘員
名防守城池四百九十名隨鎮防護哨守即諸凡捧執
旗牌旗纛金鼓軍器軍牢劊子等役皆在其中委無閒
散虛曠之役況輪守城鋪巡哨江道各官軍徹曉鳴鑼
逐更點聞日夜疲勞實無休息而各州縣以省城劫庫
之後多懷恐懼方且添僱打手添募狼兵而窘於軍餉

之不繼當事者日切隱憂尚敢為減兵之說乎況所存實數止有一千三百員名即如今議二千尚少七百應於廣東撥補及照廣西山多田少徭徭占據土族狼兵隨據耕食地之所出不足供一方之兵不得不資糧於廣東近年廣東多事如折糧每多拖欠橋稅亦漸減少計所入原額不過七萬餘兩而每歲支給省城一萬六千七百兩平樂三萬二百兩賓州一萬二千八百兩潯州與本鎮漢達狼目之兵共四萬三百兩通共該銀一

十萬兩調兵犒賞之費不與焉則此所派五萬石者縱使全納盡輸亦難供各項軍兵之用當此勢急燃眉之日又議扣糧萬一變起不虞誰任其咎此皆理勢之必不可行者及照班軍戍守非獨守一梧州也為開府梧州而設也非直體統欲尊嚴亦賴此以制三軍而威百蠻也每歲征勦動調土族狼兵而土族狼兵率皆桀驁不服調遣查點所以先臣韓雍嘗以三萬餘兵戍守梧州與土族狼兵彼此相制良為有見今以軍餉不繼戍

守不滿二千較初設無十分之一又皆分撥各營堡仍欲議減可乎本道竊以廣東官軍戍守梧州非守梧州也所以守廣東之藩籬湖廣官軍戍守廣西省城非守廣西也所以守湖廣之屏蔽守廣西而後廣東可固守藩籬而後門庭可安其勢真有不可已者不然廣西猺獞千穴土狼萬族山深箐密境壤相錯設無梧州重鎮控扼之朝發巢而暮踐郊矣恐不止海寇之縱橫已也廣東雖欲晏然可得乎此為廣東計亦有不得不然者

臣備查前項檢閱故牘粵自明興始平兩廣建官置守
紛無定議寇亂亦無寧時憲皇帝加意遐荒拔參政韓
雍為都御史假以不禦之柄度越常規當是時兵馬錢
糧皆於南京料理選調兩京江西湖廣漢達官軍不下
二十萬物力充盛故所至如摧枯拉朽無不殲滅彼雍
誠異才亦委任權力不同也嗣後分兩巡撫事不協一
盜日益熾於是用言官建議仍由雍總督而梧州開府
實自茲始本兩省交會之區諸蠻盤處之地必藉重兵

彈壓始可警服羣兇於是調兵三萬餘戍守鎮城并分
布兩省近梧村堡以謹防捕後漸減至一萬員名所以
貽東西百年之安良有以也歲久逃亡減免強半僅存
四十餘今將併見在四十之數而更減之即防守不周
潰亂四出難於控制異時推究禍本誰當任其咎者且
兩廣盜賊淵藪大者嘯聚山海黨類數千攻城劫寨負
固抗敵如曾一本黎汝誠及大羅山古田鳳凰巢八寨
十八山之類雖調遣狼兵招募浙福之兵勞費不貲未

能即滅其次千百為羣聚散倏忽大者狼兵小者土兵
調度得宜可施鵬勦如近日右江之捷南韶嶺西並舉
之捷是已又其次一二十人或三五十人投間抵釁突
出焚劫隨時隨處有之正戍守官兵之責每有擒獲而
因之驚駭解散者尤多豈謂官兵盡為虛設而紛紜鼠
狗必一一屬之狼兵乎今謂無益撤去恐賊無忌憚縱
橫愈甚勢不能不議復設也又梧鎮在萬山中谿徑甚
多前臨一水為三江下流徭獠往來通道城內穴虛民

居不過百餘守禦所官軍僅五七十人所恃壯軍容謹防禦全賴東省不待智者知所資之侈也若謂芸人之田即湖廣亦戍守桂林桂林豈楚人之田當時非諮諏審度當於事理何得行之百年人無異議至於扣留軍餉之說尤為不可廣西十萬常供每歲皆出東省近自另設巡撫已分數萬兩今本官具奏又欲將比來橋稅亦留彼中若皆分彼此而自為計如此則日侵日削東省可絕不相顧梧鎮可廢而廣西全省亦可棄置不守

矣近日嶺西道梗又遠調狼兵征調犒賞之費出於廣
西豈可概謂為芸人之田凡以天下大一統仰賴朝廷
威稜總攬於上百司同心共濟於下使兩省各保無事
則已何敢分彼此出臆見以恣爭勝之說所據各道呈
報前因誠非得已乞再加查議將廣東見在班軍四千
餘員名照舊分兩班戍守其額派米折銀五萬石亦如
數調撥以充梧鎮漢達狼目各兵之用庶經略有裨兵
防允賴地方可無意外之虞重鎮稍存建設之意矣

議廣西按察司改併道分疏 高拱

看得兩廣提督撫按等官李遷等會題稱要將廣西驛傳道事務併入清軍道管理該道僉事改作古田兵備副使仍給勅書關防以便經理五年之後將銜裁革各一節既經督撫等官會題前來相應依擬合候命下將廣西驛傳道僉事改為古田兵備副使請給勅書關防令其經略五年果有成功破格超擢其該道併管等項事宜悉照所議施行及查見任僉事汪廷鉞資俸尚淺

另候別用該設副使候本部另行推補

謝賞疏

方弘靜

奏為恭謝天恩事接得邸報該兵部題為仰仗天威討
平倡惡叛猺恭報全捷事該兩廣提督軍務右都御史
殷正茂巡撫廣西右副都御史郭應聘會題官兵勦殺
懷遠板江等處叛亂猺賊并開臣借發浙兵畢集成功
緣由本部議覆節奉聖旨是方弘靜賞銀十五兩欽此
隨於萬曆二年七月初十日據承差潘守禎齎捧欽賞

銀兩到臣當即焚香望闕叩頭祇領訖恭惟皇上文武
聖神聰明睿知泰階玉燭運方撫乎昌期磐石金甌慮
更周於荒徼頃者諸徭恃阻敢抗王章連歲稱兵竟煩
天討三軍時雨師咸出於萬全五嶺歡聲名遂安於一
怒茲諸臣之用命本一德之格天臣庸劣無能涓埃莫
效詎意兼金之重猥蒙寵錫之榮懷寶自驚賞溢懼辜
於渥典許身已愧感深徒積於微衷惟以待譴之餘年
日臨淵谷仰祝無疆之綿歷永對岡陵臣無任激切感

戴之至

請寬督辦廣西香草疏

王錫爵

題昨該戶部尚書楊俊民等會臣等於朝房專為廣西
香草一事未奉聖旨臣等看得此物專為夏天禦暑之
用今已立夏在廣西既未奉旨無憑解到在該部又恐
後時不敢推諉今日願承認辦買或多或少惟皇上之
所裁蓋緣此物價值不多而萬里盤送之費多於原價
數十倍以此欲通融曲處期於足皇上之用而已原非

重大錢糧亦無盡求減免在理無不可通而在臣等亦無不可與言者伏乞欽定斤數即與批允施行

府江善後疏

郭應聘

一曰改設土司夫欲弭盜原先據要害今荔浦之峰門南源脩仁之麗壁市永安之古眉各巡檢司皆久沒於賊宜悉革罷易為土司一移東岸營於水涯募兵二十人分屯平嶺仙家冲諸田一移西岸營於仙迴高天龍頭磯募兵二千人分屯六內六章馬尾黃牛諸田一移

上峒營於古西募兵千六百人分屯峰門大喃諸田一
移下峒兼轄西岸營於東線募兵千人分屯大宅東瓦
諸田仍復廣運足灘二堡以重巡緝土司於兵領中擇
有才勇者充其職事俾世守焉其不効者更置之

二曰更設叅將夫控要害置土司分兵屯守不有將領
以統之何以整齊約束重示彈壓也昭平舊有坐鎮都
指揮一人第事權稍輕遷代靡一宜改設叅將兼制桂
平凡兩岸三峒諸土司盡以屬之練兵簡衆戢夷防奸

其有獷悍不逞者得相機勦不為遙制

三曰開通水陸向者諸徭占據道路榛莽今蕩平之後
宜開山通道荒拓險阻西岸自昭平明源峒以達仙迴
自仙迴達古蘇永安自藤灣達馬尾象機達田冲龍頭
磯抵府治東岸自昭平里步以達水涯達平西羅山及
十三屯自羅山舊途達府治而入於沿江開緯道以便
舟挽募商伐木恣其採取俾鼠潛蟻附者無所容而風
氣亦因以漸闢

四曰酌處兵費三峒兩岸設官營堡屯卒幾七千人鹽米之需人月給三錢屯種建築諸費不與焉初年約二萬有奇梧鎮司府之藏調節而均給之次年墾田所出足以自養止勿給

五曰預定縣治府江距蒼梧五百里許中間山谷窈窕林箐蔽虧片影孤帆行同異域稽之故牒唐宋時設龍平思勒馬江沙亭數縣後胥為蠻占沒今昭平即龍平地也江之西潯廣衍寬平風氣攸聚宜即其地創一縣

治以平樂之昭平馬江二里富川之二五都賀縣之招
賢鄉上下半里割而益之總其賦得三千六百有奇而
仙迴諸田稅盡以屬之

六曰處分田糧兩岸三峒諸區覈賊遺田計四十萬畝
有奇舊屬平樂荔浦永安者令民復業輸徭賦如故各
土司屯種者人給田十畝兵領加給有差授田之初養
以月糧資以牛種三年之後計畝科糧三升蠲其徭差
著為例

懷遠善後疏

一曰移設縣治懷遠舊治環諸徭中四顧榛莽無所恃
守惟程村則附殘民板江則鄰融界固守之計宜擇於
斯二者


二曰聯東民徭諸孽自斬艾之後帖然歸順非有羈縻
曷保其終宜以太平河里四港諸孽屬之三甲猛團七
團諸孽屬之武洛洞桐木合水三門諸孽屬之白果獐
武生朱應暘統之郡鄧坡頭杲杲黃大地諸孽屬之土舍

金方里志卷八
章昌金主簿李材統之邊田板江諸孽屬之浪溪寶江
良獐千戶羅大本統之河潺蕉花諸孽屬之背江良獐
百戶任邦祚統之庶幾聯絡勢成不敢復萌異志

三曰選立社師懷之遺黎久已淪陷誠夷之將終於夷
矣宜於三甲立社師教之殘民子弟稍習知禮讓有能
通文義者錄充弟子員俾速見為善之利

四曰慎固兵防善後之策要在足兵屯戍之謀先於扼
險懷遠視板江猶門戶然宜即其地屯兵五百人以把

總王鸞領之仍給之告身責其終效庶幾局鑰既固水
陸咸資



粵西文載卷八